

OPĆINA
ILIDŽA
INFORMATIVNI BILTEN

Mart 2019. / Broj 180



12. MART - DAN OPĆINE ILIDŽA





Svečano obilježen Dan Općine Ilidža



Polaganjem cvijeća šehidima, poginulim borcima i civilnim žrtvama rata na centralnom spomen-obilježju, te svečanom sjednicom Općinskog vijeća uz prigodan program, obilježen je **12. mart – Dana Općine Ilidža** i 23. godišnjica od reintegracije općine. U Multimedijalnoj sali održana je svečana sjednica Općinskog vijeća Ilidža. Na sjednici su se obratili predsjedavajući Općinskog vijeća Ilidža Muhamed Omerović i načelnik Općine Ilidža prof. dr. Senaid Memić koji su prisutnim i svim stanovnicima Ilidže čestitali Dan Općine, te tom prilikom

podsjetili na važnost 12. marta, govorili o postignutim rezultatima, razvoju, planovima za budućnost i naglasili da samo udruženi, zajedničkim radom i znanjem možemo napraviti još veći uspjeh u razvoju općine.

Na sjednici su uručena i priznanja Općine Ilidža. Povelja za životno djelo dodijeljena je posthumno Sabitu Hadžiću Sabetu, dok je Povelja počasni građanin uručena generalu Ismetu Hadžiću Mutavelji za posebne zasluge za Općinu Ilidža i državu Bosnu i Hercegovinu u promicanju njenog suvereniteta. Pojedinačna Zlatna plaketa

pripala je Salihu Lemešu, a kolektivna firmi „Izvor Bosne“. Srebrne plakete dobili su Salem Bilalović i Azra Muzur, dok je kolektivnu dobio Ženski odbojkaški klub Igman i OBS d.o.o. Ilidža. Zahvalnice su dobili Pero Miletić, Sedin Torlak, Adisa Divoš, Ibrahim efendija Klisura i Elvedin Dino Begić.

U ime dobitnika priznanja zahvalio se general Ismet Hadžić naglasivši da je velika čast dobiti nagradu Općine Ilidža, a i velika odgovornost. Prigodan program izveli su učenici Osnovne muzičke škole Ilidža i Akademija Ake Hukelića. ■



REDOVNA SJEDNICA OPĆINSKOG VIJEĆA

Donesena Odluka o utvrđivanju prosječne konačne građevinske cijene po kvadratnom metru

Općinsko vijeće Ilidža na 25. redovnoj sjednici održanoj 28. marta 2019. godine u Multifunkcionalnoj sali donijelo je Odluku o utvrđivanju prosječne konačne građevinske cijene po kvadratnom metru korisne površine u stambenoj izgradnji na području općine Ilidža u 2018. godini. Tom odlukom utvrđuje se prosječna konačna građevinska ci-

jena 1m², korisne stambene površine na području općine Ilidža, u 2018. godini, u iznosu od 1.085,00 KM. Utvrđena prosječna konačna

građevinska cijena služi kao osnova za izračunavanje visine naknade za pogodnosti građevinskog zemljišta (rente) za 2019. godinu. ■



Kemal Habibija izabran za zamjenika predsjedavajućeg Općinskog vijeća Ilidža

Kemal Habibija izabran je za zamjenika predsjedavajućeg Općinskog vijeća Ilidža na 25. sjednici Općinskog vijeća Ilidža, nakon što je izglasano rješenje o razrješenju zamjenika Dževada Poturka zbog prestanka mandata. Kandidati za ovu funkciju bili Faik Harović, Azra Jahić, Miro Grbavac i Kemal Habibija, koji je izabran sa 17 glasova. ■



Nacrt Odluke o uslovima i načinu držanja kućnih ljubimaca, pasa i domaćih mački

Općinsko vijeće Ilidža utvrdilo je Nacrt Odluke o uslovima i načinu držanja kućnih ljubimaca, pasa i domaćih mački, načinu postupanja s napuštenim i izgubljenim životinjama na području općine Ilidža. Tekst Na-

crt Odluke će u toku trajanja rasprave biti objavljen na web stranici Općine. Primjedbe, mišljenja i sugestije na Nacrt Odluke,

subjekti javne rasprave i svi ostali zainteresirani mogu dostaviti najkasnije do 30. aprila 2019. u pisanoj formi Stručnoj službi za koordinaciju rada MZ i to putem Centra za pružanje usluga građanima Općine Ilidža. Zadužena je Komisija Općinskog načelnika za izradu ove odluke da Općinskom vijeću podnese izvještaj o re-

sultatima javne rasprave i Vijeću dostave na usvajanje. ■





Prijedlozi akata o regulisanju imovinsko-pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevu Košuta Safeta i Košuta Hazira. Usvojeni su i prijedlozi rješenja o utvrđivanju prava vlasništva na zemljištu u korist Šuvalija Suada i drugih. ■



Usvojen Izvještaj o radu Savjeta MZ

Izvještaj o radu Savjeta MZ u 2018. te Program rada za 2019. našao se na 25. redovnoj sjednici Općinskog vijeće Ilidža.

Vijeće je usvojilo ovaj izvještaj, uz zaključak da nadležne općinske službe (Služba za koordinaciju rada mjesnih zajednica, Služba za obrazovanje, kulturu, sport i informisanje i Služba za zajedničke poslove) u naredbe dva mjeseca implementiraju projekat uvođenja Facebook stranica mjesnih zajednica na području naše općine kao novog oblika oglašavanja i komunikacije sa građanima. Vijeće je donijelo i Odluku o objavljivanju javnog oglasa za imenovanje četiri člana Općinske izborne komisije. Oglas će biti objavljen 1. aprila u Oslobođenju, a bit će i na web stranici Općine Ilidža, kao i oglasnoj ploči Općine. Rok za podnošenje prijave je osam dana od dana objavljivanja u dnevnom listu. ■

Visina naknade za privremeno korištenje javne površine u sezoni 22 KM po kvadratnom metru

Općinsko vijeće usvojilo je Prijedlog Odluke o dopuni Odluke o privremenom korištenju javnih površina na području općine Ilidža. Visina naknade za privremeno korištenje javne površine zbog postavljanja baštanskih stolova i stolica ispred ugostiteljskih objekata, izložbenih stolova i stalaka za izlaganje robe uz trgovačku radnju ili postavljanja tende na tlo i sl., po odobrenim urbanističko-tehničkim uslovima u sezonskom periodu od 15. aprila do 15. oktobra tekuće godine, mjesečno po kvadratnom metru iznositi će 22 KM, odnosno za vansezonski

period od 16. oktobra do 14. aprila naredne godine mjesečna naknada po kvadratnom metru za ekstra zonu iznositi će četiri marke po kvadratnom metru, a ekstra zona sa tendom 12 KM. Zahvaljujući navedenoj investiciji vlasnicima poslovnih objekata je na ponudi natkrivena i osvijetljena javna površina za postavljanje baštanskih stolova i stolica što je razlog dopuni člana Odluke kojim se utvrđuje visina naknade za izdavanje javne površine sa tendom u ekstra zoni I time valorizuju uložena finansijska sredstva i novi kvalitet ponude. ■



Usvojen Izvještaj o radu Drugostepene stručne komisije za 2018. godinu

Vijeće je usvojilo Izvještaj o radu Drugostepene stručne komisije za 2018. godinu sa ocjenom stanja i prijedlogom mjera. Komisija je u izvještajnom periodu, a u okviru propisima određenih nadležnosti poduzimala propisane radnje, vodila aktivnosti u cilju rješavanja po žalbama, te u zakonom propisanim rokovima provela žalbene postupke i donijela odluke i riješila sve zaprimljene predmete. Komisija je u izvještajnom periodu održala 18 sjednica na kojima je razmatrala 85 predmeta, od kojih je 50 žalbe i 35 tužbi. Komisija je u okviru propisima određenih nadležnosti poduzela propisane radnje, vodila aktivnosti u cilju rješavanja po žalbama, te u zakonom propisanim rokovima provela žalbene postupke i donijela odluke i riješila sve zaprimljene predmete. ■



Izvještaj o radu i finansijskom poslovanju JP „Ilidža“

Općinsko vijeće je na sjednici usvojilo Izvještaj o radu Javnog preduzeća „Ilidža“ d.o.o. za poslovnu 2018. godinu (Finansijski izvještaj, Izvještaj o radu Odbora za reviziju, Izvještaj o radu Skupštine preduzeća, Izvještaj o radu Nadzornog odbora, Odluku o raspodjeli dobiti za 2018. godinu i Odluku o godišnjem izvještaju za 2018. godinu).

Na prijedlog Komisije za Budžet, privredu, finansije i ekonomska pitanja,

Vijeće je donijelo zaključak kojim se zahtijeva da nadležne općinske službe i Pravobranilaštvo Općine Ilidža ubuduće daju svoje mišljenje na sve materijale JP „Ilidža“ i svih ustanova čiji je osnivač Općinsko vijeće, te da općinski načelnik predloži adekvatan loka-

litet za smještaj mehanizacije i opreme preduzeće. Sugerise se menadžmentu JP „Ilidža“ da ostvari veću saradnju sa mjesnim zajednicama. Javno preduzeće „Ilidža“ d.o.o. za obavljanje komunalnih i drugih djelatnosti je od javnog interesa čiji je osni-

cu učinjeni su značajni naponi na poboljšanju uslova za održavanje kulturnih i sportskih manifestacija od lokalnog, državnog i međunarodnog značaja. Preduzeće je u izvještajnom periodu realizovalo poslove održavanja čistoće na javnim površinama, košenje trave, uređenje korita vodotoka, održavanje javnih česmi, fontana

i Centralnog spomen obilježja, održavanje uređaja i postrojenja lokalne kanalizacione mreže, održavanje

putnog i zaštitnog pojasa saobraćajnica, kanala i rigola i zimsko održavanje pješačkih staza i platoa. U proteklom periodu izvršena su značajna ulaganja u nabavku opreme i sanaciju objekata, a ostvareni su pozitivni finansijski rezultati. ■



vač Općina Ilidža, kroz čiju se aktivnost i djelatnost zadovoljava potrebe stnovnika pružanjem kvalitetnih komunalnih i drugih usluga uz maksimalno poštivanje zaštite okoliša. U tom prav-



Potpisan Ugovor za održavanje Festivala narodne muzike „Ilidža 2019“

Općina Ilidža će i ove godine organizirati i realizirati kulturno-muzičku manifestaciju pod nazivom Festival „Ilidža 2019“. S ciljem da i ove godine Festival okupi nove muzičke stvaraoce i interpretatore, pripreme su počele i ranije. Tehnički organizator kao i prethodnih godina je Hayat televizija.

U Općini Ilidža je tim povodom 6. marta 2019. godine potpisan Ugovor o organizaciji Festivala, a potpisali su ga načelnik Općine Ilidža prof.dr. Senaid Memić i direktor Hayat TV Elvir Švrakić.

- Svako vrijeme donosi, neku posebnost, pa i u muzici Nadamo da će i ove godine publika biti zado-



voljna. Ilidžanski festival je naš brend, nešto što našu lokalnu zajednicu čini prepoznatljivom u cijelom regionu, i nastavljamo i ove godine, nadam se najboljom” izjavio je, između ostalog, načelnik Memić.

- Tim profesionalaca i muzičkih

znalaca, okupljenih oko pripreme i realizacije Festivala, učinit će sve kako bi Festival u skorijoj budućnosti postao najveći regionalni muzički festival. Mi ćemo se potruditi da ga tehnički organizujemo bolje nego prošle godine – rekao je Švrakić. ■

Održana Prva lokalna dijaloška platforma

U organizaciji Općine Ilidža i Centra za promociju civilnog društva 14. marta 2019. godine u prostorijama Općine Ilidža održana je Prva lokalna dijaloška platforma pod nazivom „Izgradnja kohezivne lokalne zajednice koja brine o svojim članovima i članicama“. Platforma je održana u okviru projekta „Dijalog za budućnost“ koji je razvijen na inicijativu i pod pokroviteljstvom Predsjedništva BiH, a zajedno ga provode UNICEF, UNDP i UNESCO.

Prvoj dijaloškoj platformi prisustvovala su 22 predstavnika lokalnih

omladinski organizacija, nevladinih organizacija koje okupljaju mlade, žene, profesionalno osoblje, kulturno-umjetnička društva, obrazovne, kulturne i zdravstvene institucije, predstavnici lokalne samouprave i drugi lokalni akteri zainteresovni za poboljšanje društvene kohezije u općini Ilidža. Cilj platforme je da se zainteresovanim u općini Ilidža pruži prilika da kroz strukturalni dijalog diskutuju i identifikuju prioritetne probleme koji stoje na putu izgradnje kohezivne zajednice, te da lokalnim vlastima preporuče način njihovog rješavanja. ■



Podijeljeno 2000 sadnica voća

U sklopu proljetne sadnje, Općina Ilidža je i ove kao i predhodnih godina provela akciju podjelu sadnica voća stanovnicima općine. Ukupno je podijeljeno 2.000 sadnica, od toga 800 sadnica jabuke, 500 šljive i 700 sadnica kruške. Distribucija i podjela sadnica stanovnicima obavljena je po mjesnim zajednicama. Prednost prilikom podjele imali su građani koji predhodnih godina nisu bili obuhvaćeni podjelom. Ovo je još jedna od akcija u nizu kojim Općina Ilidža pomaže stanovnicima u razvoju poljoprivrede. Za nabavku sadnica Općina je izdvojila 4.960 KM. ■

Pamti Kotorac i ne zaboravljaš Kotoracke bitke

Ispred spomen-obilježja u Donjem Kotorcu 18. marta 2019. polaganjem cvijeća i učenjem Fatihe obilježena je godišnjica legendarne Kotoracke bitke i Dan mjesne zajednice Butmir. Organizatori obilježavanja ove manifestacije su Jedinstvena organizacija boraca "Unija veterana" Ilidža i Općina Ilidža, Ministarstvo za boračka pitanja Kantona Sarajevo, Mjesne zajednice Butmir i Donji Kotorac, osnovne i srednje škole ilidže, te Islamska vjerska zajednica iz Butmira.

Nastavljajući dugogodišnju poslijeratnu tradiciju obilježavanja značajnih datuma, događaja i ličnosti i njegujući historiju borbe protiv agresije i ove godine po 24. put okupili su se nekadašnji suborci, građani, učenici i brojni gosti kako bi na dostojanstven način obilježili Memorijalno-historijski susret „Dani kotorackih bitaka.“ Cvijeće su položile delegacije Općine Ilidža, Kantona Sarajevo, boračkih udruženja, porodica šehida i poginulih boraca, rodbina i prijatelji. Cvijeće je položeno i ispred spomen-obilježja u Butmiru

„Okupili smo se da još jednom i svi zajedno, iskažemo naše poštovanje prema našim braniocima Donjeg Kotorca i braniocima cijele Bosne i Hercegovine, prisjetimo se izuzetno važnih događaja koji su se odvijali upravo na ovim prostorima u toku teških



i krvavih ratnih godina. „Bitka za Kotorac odvijala se od 17. do 21. marta 1993. godine i to najveća i najvažnija bitka na ovim prostorima, a u Kotorcu je bilo još mnogo bitaka i svi koji su bili u ovim bitkama su heroji. Bila je to jedina nada za opkoljeno Sarajevo, bila je to granica nemogućeg, odbranjen je put spasa i slobode. Odbranom Kotoraca, odbranjeno je i Sarajevo“ poručio je komandant Četvrtе viteške brigade general Fikret Prevljak.

Tih dana ovdje su poginuli: Amir Ahmet-spahić, Hajrudin Čatović, Hu-seini Arsim, Izet Kadić, Hajrudin Kalauzović, Nurko Kršo, Ekrem Mujkić, Jusuf Mulaosmanović, Ahmed Pajević, Vahid Silajdžić,

Nusret Suljević, Nedžad Šehović, Nijaz Tucaković i Hamid Dupovac-Haće, pripadnik jedinice „Crni labudovi“.

Svoj doprinos obilježavanju ovog značajnog datuma dali su i učenici Prve, Pete, Osme, osnovne škole „Amer Ćenanović“ i Četvrtе

gimnazije.

Kako su nam rekli iz JOB Unije veterana memorijalno-historijske susrete organizuju najviše zbog učenika i generacija koje dolaze, da bi im kazali šta se to dešavalo u najtežim ratnim godinama naše historije, a što, još uvijek, ne mogu učiti u svojim školama i školskim knjigama, ali i zbog preživjelih boraca i naroda ovih prostora, koji je bio sudionik tog vremena – da se još jedanput podsjetite i da se ne zaboravi,

Narod je izdržao nezapamćenu agresiju, slabo naoružani, nedovoljno organizovani i pripremljeni, borci – heroji, su se oduprijeli mnogostruko jačem i opremljenijem agresoru, spremni i odlučni da u toj borbi, za spas svog naroda, daju svoj život. - i uspjeli su tada, ali uspjeli su i u svim ostalim odbranama Donjeg Kotorca, a odbrana se vodila, bukvalno, svaki dan, svih ratnih godina. na ruševinama starog, danas je izrastao novi, daleko ljepši Kotorac.

Nagrađeni su i učenici u pisanju literarnih radova. Treće mjesto u pisanju literarnih radova je osvojio Ahmed Zjajo, učenik šestog razreda, drugo mjesto učenica sedmog razreda Hadžera Ćelović i prvo mjesto pripada učenici devetog razreda Remzi Oković. ■





Obilježen Svjetski dan oralnog zdravlja

Svjetski dan oralnog zdravlja obilježava se svakog 20. marta zbog podizanja svijesti o problemima oralnog zdravlja i važnosti njege usne šupljine. Cilj je istaknuti važnost održavanja čistih i zdravih zubi, educirati širu javnost o pravilnoj njezi usne šupljine i razvijati svijesti o važnosti oralne higijene kao predujeta za oralno zdravlje pojedinca i njegov uticaj na opće zdravlje. S obzirom na to, da se najproširenija dentalna bolest zubni karijes, najčešće javlja kod djece, u organizaciji Općine Ilidža u Grand centru na dva postavljena štanda, doktori medicine, stomatologije razgovarali su sa učenicima, i posjetiteljima o važnosti pravilnog četkanja zuba, održavanja zuba, a i cjelokupnog zdravlja.

Komisija za izbor, imenovanja i pitanja ravnopravnosti spolova i Komisija za zaštitu ljudskih prava, predstavke i prijedloge u saradnji sa Općinom Ilidža utvrdile su aktivnosti na realizaciji četvrtog cilja Plana implementacije Gender akcionog plana u 2019. – Podizanje svijesti o značaju zdravlja za ukupan kvalitet života - Edukacija o značaju oralnog zdravlja.

Članice Radne grupe, vijećnice Alma Vatrić, inače stomatolog i Azra Jahić na dva promotivna štanda u saradnji sa Stomatološkom komorom FBiH, Organizacionom jedinicom DZ Ilidža, te učenicama i stipendistima Općine Ilidža razgovarale su o značaju oralnog zdravlja dijelile informativne materijale, četkice i zubne paste, a sve u cilju unaprijeđenja svijesti o značaju oralnog zdravlja. ■

Najmlađi u posjeti Općini Ilidža

Općinu Ilidža i načelnika prof.dr. Senaida Memića posjetili su 13. marta naši najmlađi sugrađani, djeca vrtića „Amel i Nur“ Ilidža

Mališani su, u ime sve djece koja pohađaju ovu predškolsku ustanovu, uručili poklon načelniku Memiću za Dan

Općine Ilidža.

Prilikom ovog susreta načelnik Memić je govorio o svom jednom radnom danu, te o tome kako je biti načelnik. Na pitanje ko će biti načelnik kad poraste, bilo je mnogo mališana. Otpjevali su i pjesmu o BiH. ■



Načelnik Memić upoznao mališane sa problematikom stare Željezničke stanice

Učenici sedmog razreda Desete osnovne škole rade iz predmeta demokratije “Obnova stare Željezničke stanice na Ilidži”. Takmičit će se iz projekta Građanin koje organizuje CIVITAS i predstaviti će tu temu.

Tim povodom 7. marta posjetili su Općinu Ilidža. Ugostio ih je načelnik Općine prof.dr.

Senaid Memić i predsjedavajući Općinskog vijeća Muhammed Omerović.

Načelnik Memić je upoznao školarce sa problematikom obnove stare Željezničke stanice, a dao im je i odgovore na njihova pitanja, koja će im pomoći kako bi što bolje predstavili svoju školu. ■



Održano općinsko takmičenje osnovnih škola iz Bosanskog, Hrvatskog i Srpskog jezika i književnosti

Takmičenje učenika osnovnih škola sa područja općine Ilidža iz Bosanskog, Hrvatskog i Srpskog jezika i književnosti održano je 15. marta 2019. godine u prostorijama Četvrte gimnazije Ilidža. Na takmičenju su učestvovali učenici sedmih i osmih razreda iz 12 osnovnih škola, a svaku školu su predstavljala po dva učenika. U pojedinačnoj konkurenciji u kategoriji sedmih razreda prvo mjesto

dijele Adna Maslo iz Druge, Merjem Pobrić iz Šeste i Adela Čorbo iz Sedme osnovne škole, drugo mjesto sa jednakom brojem bodova osvojile su Taida Terzo iz Četvrte i



Ena Dorić i Devete osnovne škole i treće mjesto osvojila je Hadžera Čelović iz Prve osnovne škole. Kod osmih razreda prvo mjesto pripalo je Nihadi Šabotić iz Desete osnovne škole, drugo Hani Selimović iz Devete i treće dijele Hana Banda iz Treće i Adem Džihic iz Četvrte osnovne škole. U ekipnom plasmanu najbolja je Deveta osnovna škola, druga je Deseta i treća Četvrta osnovna škola. ■

Najbolji matematičari Pete osnovne škole



Za učenike osnovnih škola općine Ilidža, 5. marta 2019. godine u Četvrtoj gimnaziji Ilidža, održano je 24. općinsko takmičenje iz matematike. Takmičili su se učenici sedmih, osmih i devetih razreda iz 12 osnovnih škola. Svaku školu predstavljalo je po devet učenika.

U pojedinačnoj konkurenciji u kategoriji sedmih razreda prvo mjesto osvojio je Meldina Osmanović iz Pete osnovne škole, drugo dijele Anatulah Zulović iz Osme osnovne škole „Amer Čenanović“ i Merjem Kurtović iz Treće osnovne škole i treće Dženneta Mujagić iz Pete osnovne škole. Kod osmih razreda prvo mjesto osvojio je Harun Alibegović, drugo Nadir Hrustanbegović oba iz Osme osnovne škole „Amer Čenanović“ i treće Emina Vatrić iz Pete osnovne škole. Pobjednik devetih razreda je Halid Gakić iz Četvrte osnovne škole, drugi je Bakir Poljić iz Treće, a treća je Belma Dorić iz Devete osnovne škole. U ekipnom plasmanu najbolja je Peta osnovna škola, drugo mjesto zauzela je Osma osnovna škola „Amer Čenanović“ i treće Četvrta osnovna škola. ■

Učenici Druge osnovne škole pobjednici takmičenja iz fizike

Za učenike osnovnih škola općine Ilidža, 7. marta 2019. godine u Četvrtoj gimnaziji Ilidža, održano je 24. općinsko takmičenje iz fizike. Takmičili su se učenici osmih i devetih razreda iz jedanaest osnovnih škola. Svaku školu predstavljalo je po šest učenika.

U pojedinačnoj konkurenciji u kategoriji osmih razreda prvo mjesto osvojio je Nadir Hrustanbegović iz Osme osnovne škole „Amer Čenanović“, drugo Harun Alibegović također iz Osme osnovne škole „Amer Čenanović“ i treće Emina Ahmetović iz Druge osnovne škole. Kod devetih razreda prvo mjesto osvojila je Lamija Fatić iz Pete osnovne škole, drugo Vedad Mulaosmanović iz Druge, a treće Berina Karić iz Devete osnovne škole. U ekipnom plasmanu najbolja je Druga osnovna škola, druga Peta osnovna škola i treća Osma osnovna škola „Amer Čenanović“. ■





Informatičari Šeste osnovne škole osvojili prvo mjesto

Općinskog takmičenja iz informatike učenika osnovnih škola Ilidže 22. po redu održano 11. marta 2019. godine u Četvrtoj gimnaziji Ilidža. Na takmičenju su učestvovali učenici iz 11 osnovnih škola, a svaku školu predstavljalo je po tri učenika. Prvo mjesto zauzeli su informatičari Šeste osnovne škole sa osvojenih 95 bodova, a



koju su predstavljali Adnan Adrović, Ajnur Kušundžija i Muhamed Pašić. Drugo mjesto sa 55 bodova

primalo je ekipi Desete osnovne škole za koju su se takmičili učenici Nedim Gabela, Bakir Osmanović i Muhamed Avdić, dok je trećeplasirana Četvrta osnovna škola i njeni učenici Senad Hošić, Amar Leka i Arnes Husović koji su osvojili 45 bodova. Pobjednička ekipa predstavljat će Općinu Ilidža na kantonalnom takmičenju. ■

Na takmičenju iz geografije najbolja Berina Juković

Dvadesetdrugo općinsko takmičenje učenika osnovnih škola Ilidže iz geografije, pod pokroviteljstvom Općine Ilidža, a u organizaciji Službe za obrazovanje, kulturu, sport i informisanje održano je u Četvrtoj gimnaziji Ilidža 12. marta 2019. godine. Na takmičenju su učestvovali učenici devetih razreda iz 12 osnovnih škola, a

svaku školu predstavljalo je po tri učenika. Prvo mjesto osvojila je učenica Treće osnovne škole Berina Juković, drugo Mahir Jama-ković iz Prve, a treće Ahmed Bašić također iz Prve osnovne škole. U ekipnom plasmanu najbolja je Prva osnovna škola, druga je Deveta osnovna škola i treća Treća osnovna škola. ■



Druga osnovna škola najbolja u poznavanju prve pomoći

Dvadeset četvrto općinsko takmičenje iz prve pomoći održano je 23. marta 2019. godine u organizaciji Crvenog križa Općine Ilidža. Takmičenje je održano u Međunarodnoj gimnaziji "Rich-

mond Park International Secondary School", a učešće je uzelo jedanaest osnovnih te dvije srednje škole.

Ekipe su svoje znanje pokazale na trinaest poligona, šest rekreacij-

skih, te sedam takmičarskih: nesreća na školskoj priredbi, saobraćajna nesreća, sječa drva, nesreća na času fizike, nesreća na času tjelesnog odgoja, migrantska situacija, kardiopulmonalna reanimacija.

U kategoriji omladine prvo mjesto pripalo je Međunarodnoj srednjoj školi Ilidža, a drugo Četvrtoj gimnaziji. U kategoriji podmlatka prvo mjesto osvojila je Druga osnovna škola, drugo Četvrta osnovna škola, a treće Prva osnovna škola. Ekipe Međunarodne srednje škole i Druge osnovne škole će predstavljati CK Ilidža na predstojećem kantonalnom takmičenju iz prve pomoći koje će biti održano 20. aprila 2019. godine. ■





Osma godina "Ilidžo u srcu i stihu te nosim"



Osamu godinu zaredom, Udruženje za očuvanje tradiciju i razvoj kulturno-umjetničkog stvaralaštva "BAŠLIJA" povodom "Dana Općine Ilidža 2019" organizovalo je večer poezije "Ilidžo, u srcu i stihu te nosim". Ilidžom su na ovoj poetskoj večeri odzvanjali stihovi koji dolaze iz srca svakog djeteta, jer su svoje stihove pisali sa puno pažnje, posvećenosti i ljubavi prema Ilidži.

Svečanost je organizovana u sali Multimedijalnog centra Ilidža 15.marta 2019.godine.

U ovom projektu, učestvovalo je 180 učenika, iz devet osnovnih škola, za koje je bilo zaduženo 36 nastavnika. Učestvovala su Prva, Druga, Treća, Četvrta, Peta, Šesta, Sedma, Deveta i Deseta osnovna škola. Učenici su svoje radove pisali na teme: "Ilidža je mjesto ljepote i dobrote" i "Ilidža je moj svijet i moj grad."

Na ovoj poetskoj noći organizator je dodijelio i Specijalnu nagradu, pod nazivom „AIDA LUŠNIČKIĆ“ za najbolji, među najboljim literarnim radovima. Ova vrijedna nagrada pripala je učenici devetog razreda Remzi Oković iz JU „Prva osnovna škola“ Ilidža.

Cijeli program uljepšali su najmlađi članovi folklorne sekcije Šeste osnovne škole-članovi Udruženja

"BAŠLIJA" koje je za ovu priliku pripremila Dženana Ramović.

U revijanom dijelu programa nastupio je o prošlogodišnji dobitnik specijalne nagrade "AIDA LUŠNIČKIĆ" učenik Desete osnovne škole Mirnes Omerović, koji je prezentovao prošlogodišnju pobjedničku pjesmu koja se nalazi u Zbirci pjesama, koju je izdao.

Mirnes je ovom prilikom jednu Zbirku svojih pjesama poklonio i ovogodišnjoj pobjednici.

Pokrovitelj manifestacije je Općina Ilidža.

Nagrađeni su sljedeći učenici. Drugi razredi : prvo mjesto Nađa Jahić, Druga osnovna škola, drugo Admira Indži Mehmedika, Druga osnovna škola i treće Ajla Sipović, Četvrta osnovna škola. Treći razredi: pobjednik Abdulah Bećirović, Četvrta osnovna škola, drugo mjesto Emina Mršo, Treća osnovna škola i treće Zerina Glavinić, Četvrta osnovna škola. Četvrti razredi: prvo mjesto

Lamija Vatrić, Druga osnovna škola, drugo Nejla Šahović, Peta osnovna škola i treće dijele Tarik Voloder, Druga osnovna škola / Nejla Voloder, Druga osnovna škola.

Peti razredi: prvo mjesto Lamija Tabaković, Deveta osnovna škola, drugo Nermin Maličević, De-

seta osnovna škola/Nedžma Hošić, Četvrta osnovna škola te treće Amina Longo, Deseta osnovna škola/Asja Aganović, Deseta osnovna škola.

Šesti razredi: pobjednica Sarah Čelik, Prva osnovna škola, drugo mjesto Adina Hebibović, Četvrta osnovna škola/Ilma Pleh, Šesta osnovna škola, te treće Imran Avdić, Deseta osnovna škola / Lajla Šehović, Treća osnovna škola, Lamija Milišić, Druga osnovna škola.

Sedmi razredi: prvo mjesto Anel Kreho, Šesta osnovna škola, drugo Nejra Salihović, Druga osnovna škola i treće Edin Ramdedović, Treća osnovna škola / Lamija Delić, Peta osnovna škola.

Osmi razredi: prvo mjesto Amila Nalo, Deseta osnovna škola, drugo Suana Ahmetović, Deseta osnovna škola/Vildana Alajbegović, Sedma osnovna škola i treće Amra Džebo, Prva osnovna škola/Manar Abdo Mohamed Hasan, Deseta osnovna škola / Mevludin Jahić, Sedma osnovna škola.

Deveti: pobjednik Amina Musić, Deveta osnovna škola, drugo Adela Čohodar, Četvrta osnovna škola/Aner Atović, Druga osnovna škola, te treće Džan Hošić, Četvrta osnovna škola/Nejla Čavčić, Šesta osnovna škola. ■



Očišćen plato ispred Doma Kulture u Hrasnici

Ekološko udruženje Aleja 24. marta 2019. realizovalo je akciju čišćenja. Aktivisti su očistili fontanu i plato ispred Doma kulture u Hrasnici, a sakupljena je i značajna količina raznog otpada. Iz Aleje pozivaju građane da se solidarišu sa prirodom, njenim blagodetima koji su značajan faktor zdravog života čovjeka. ■



“Neka se čuje i naš glas”

Udruženje za engleski jezik i kulturu English Club u saradnji sa Osmom osnovnom školom “Amer Čenanović” je raspisalo literarni konkurs za najbolji individualni rad o temi “Neka se čuje i naš glas.” Najuspješniji eseji su nagrađeni, a održana je i priredba na kojoj su članovi udruženja pokazali da mladi mogu i znaju rješavati velike-male probleme kroz igru i pjesmu. Manifestacija je doprinos obilježavanju Dana Općine Ilidža, jer mladi su naša budućnost. ■



Veče folklora

Udruženje “Bašlija” 23. marta 2019. održalo je cjelovečernji koncert u čast obilježavanja 12. marta Dana Općine Ilidža, koji je bio veoma posjećen. Kroz bogat kulturno-zabavni i umjetnički program, predstavile su se folklorne sekcije Udruženja „Bašlija“, sa više od 150 izvođača i kroz nekoliko koreografija. Program se realizovao u Velikoj sali Multimedijalnog centra Ilidža. ■



Sve što želiš da znaš o pubertetu

Agencija „Grey Worlwide“ kao i svake godine sa učenicima šestih razreda Osme osnovne škole



„Amer Čenanović“ realizirala je edukativni školski program „Sve što želiš da znaš o pubertetu.“ Program je odobren od strane Ministarstva za obrazovanje Kantona Sarajevo. Svrha predavanja je informisanje djevojčica o fizičkim i emocionalnim promjenama, koje će se događati u pubertetu, kao i obrazovanje djevojčica po pitanju ženske higijene. ■

“Siromašni Romeo”

Povodom Dana općine Ilidža članovi dramske sekcije „Sedme osnovne škole“ iz Blažuja su 15. marta nastupali u sali kina Igman. Na početku programa prisutne je pozdravila talentovana glumica i pjevačica Ema Durić sa svojim pjesmama. U prepunoj sali kina Igman, članovi dramske sekcije “Sedme osnovne škole” iz Blažuja: Ena, Ema, Emina, Emrah, Amina, Haris S., Haris M., Faris, Vildana i Amra, izveli su predstavu “Siromašni Romeo”, urađenu po tekstu velikog Šekspira, koju je za djecu prilagodio i napisao pisac Tode Nikoletić i naravno uz malu adaptaciju i prilagođavanje teksta, učitelja Hajrudina Neradina. ■

Uskoro udruženje žena koja su u ratu radile u općini

U raznim temama koje se danas obrađuju o pitanjima žena u Bosni i Hercegovini, rijetko je priča o ženama koje su nesebično dale svoj doprinos u odbrani i očuvanju legaliteta naše zemlje. Ovo je priča o njima, o hrabrim ilidžanskim ženama, koje su neustrašivo koračale do svog radnog mjesta, znajući da im je to možda zadnji dan. Dolazile su dobrovoljno, pješačeći, biciklom, pod granatama iz Sokolović-Kolonije, Butmira i Hrasnice i sve je radilo, od ovjere, urbanizma, privrede, evidencije, matičnog ureda, i tu počinju nova prijateljstva, nove neraskidive veze. Bile su uvijek sređene, uredne, prkoseći neprijateljima države. Gdje su danas te neustrašive djevojčice, djevojke, žene?

Da li su zaboravljene? Da li ih neko zove na obilježavanje značajnih datuma u kojima su i one sudjele? Gdje su te ratne heroine? Upravo, zbog odgovora na ova pitanja, grupa žena koje su u toku rata radile u općini, okupile su se jer žele da kažu da su one tu, da se i dalje istim elenom bore za državu BiH, da je isto vole kao 1992. godine, da će se sjećati tih ratnih dana

dok žive i da žele da se njihov angažman ne zaboravi.

Njihova prva ideja je osnivanje udruženja, koje će ih okupljati.

Ideja je potekla od Aida Biberović, pravnice Općine Ilidža koja i danas radi kao i u ratu, odgovorno i nesebično, dajući sebe u izgradnji jedine nam države. Danas, Aida je majka dvoje odrasle djece, ali isti prkosni pogled isti osmijeh. Ponošna, kaže što je u ratu bar malo doprinijela.

“Mi ćemo se okupiti i ove godine u aprilu, bar ove žene koje su tu u BiH. Želimo da se tradicionalno okupljamo i čuvamo od zaborava ono što smo preživjele. Želimo da svjedočimo novim generacijama i da im šaljemo poruke da smo i mi pravile ovu državu, da se i mi u najtežim trenucima nismo bojale, a ne bojimo se ni danas. Mi smo časno i pošteno obavljale svoj posao i zaslužujemo poštovanje, nekih budućih generacija koje će se roditi i možda nas pozvati da im ispričamo kako je bilo ovdje kad je bilo najteže” dodaje Aida Biberović.

Jedna od članica Munira Viteškić napisala je pjesmu posvećenu njima i prvi put je javno objavljujemo.

Žene Heroine

U vihoru rata rađale smo nadu
Svakim dahom svojim uzimale snagu
Još poneki suton sanjale smo krišom
Ne bi li nam sunce sjalo u danu kišnom

U sjenci bitaka za odbranu grada
Radile smo vrijedno, časno čak i tada
Barikade nisu prepreke nam bile
Zajedništvom svojim mi smo gnijezdo svile

Stradanja i tuge morale smo kriti
Žena heroina nije lako biti
Kad bi neka od nas posustala tada
Jedna drugoj bivale smo podrška i nada

Sinove i kćeri rađasmo u strahu
U odsustvu duha i posljednjem dahu
Ponosne smo Bosni udahnule dušu
Svjetlost djece naše razbi ratnu tmušu

Još poneka priča sad ostade nama
Sjećamo se s tugom prošlih ratnih dana
Žene heroine nazvasmo se same
Istinski svjedoci stvarne ratne drame

Ne trebamo počast, pohvale i cvijeće
Našu snagu mnogi nikad shvatit neće
Glasno ćemo sada samo jedno reći
ŽENA HEROINA ponos je najveći

Munira Viteškić

Promovisana knjiga Samira Bostandžića



Pod pokroviteljstvom Općine Ilidža 14. marta održana je promocija knjige “Šampion sam, jer ne odustajem” autora Samira Bostandžića. Promocija knjige je održana u sali Multimedijalnog centra Ilidža pred oko 250 prisutnih posjetilaca.

“Posebnu zahvalnost iskazujemo općinskom načelniku Senaidu Memiću na velikoj podršci. Bez te podrške ovaj događaj ne bi bio na onom nivou o kojem se uokolo priča najpozitivnijim riječima” rekao nam je Bostandžić. ■



Adem Fetahović osvojio zlato

U Bijeljini od 28. - 31. marta 2019. godine održan je Europa kup u olimpijskom boxu na kojem je nastupilo 250 boksera iz 12 zemalja.

Takmičar BK Ilidža i reprezentativac BiH Adem Fetahović osvojio zlatnu medalju u seniorskoj konkurenciji u kategoriji -69 kg.

U finalnom meču prekidom je pobijedio reprezentativca Grčke Georgiosa Chorvalkosa te na taj način potvrdio da je jedan od najozbiljnijih kandidata za Olimpijske igre 2020. godine. ■



Karate klub "Champion" nastavlja šampionski

Na državnom prvenstvu za seniore, veterane i para karatiste koje je održano 10. marta godine u sportskoj dvorani Amel Bečković u Vogošći Karate Klub "Champion" sa Ilidže je dokazao da je apsolutni lider te zauzeo prvo mjesto u generalnom plasmanu sa četiri zlatne i isto toliko srebrenih medalja. U kategoriji do 60 kg prvo mjesto je zauzeo Eldin Hajdarpašić dok je Mirnes Agović zauzeo drugo mjesto. U kategoriji do 67 kg prvi je bio Ervin Galić dok je drugo mjesto zau-

zeo Nermin Ramčilović.

U kategoriji do 75 kg Jusuf Suljić je zauzeo prvo mjesto. U kategoriji do 84 kg Ajdin Vatrić osvojio je drugo mjesto.

U kategoriji preko 84 kg prvo mjesto je pripalo Anesu Čongi dok je Edin Sarić zauzeo drugo mjesto.

Pred takmičarima Karate Kluba "Champion" je prvenstvo Europe za seniore koje se ove godine održava u Guadalajari, Španija i seniorsko prvenstvo balkana u Čačku, Srbija. ■

Na turniru u šahu učestvovalo 20 igrača

U organizaciji šahovskog kluba „Igman“ Ilidža, 10. marta 2019. godine u prostorijama mjesne zajednice Hrasnica I, a povodom Dana općine Ilidža, održan je tradicionalni otvoreni turnir u šahu. Na turniru je učestvovalo 20 igrača koji su igrali po Bergerovom sistemu tempo igre 10 minuta po igraču, a odigrano je 19 kola. Prvo mjesto osvojio je Aziz Ćosović, drugo Muzafer Nedžad Dedić, treće Eldin Bučan i četvrto mjesto Refik Zenović. Sudija turnira je bio Kemal Bajramović. Pobjednicima su uručene prigodne nagrade. Pokrovitelj turnira je Općina Ilidža. ■



Najbolji boćari Damir Bajić i Drago Dodler

Na terenima boćarskog stadiona 23. marta 2019. godine u organizaciji Boćarskog kluba "Napredak" i Općine Ilidža održan je Deveti boćarski turnir, u povodu Dana općine Ilidža. Pobjednici turniru su Damir Bajić i Drago Dodler, članovi BK Napredak, drugo mjesto Anto Rozić iz Mostara, a treće BK Zenica. Za najboljeg igrača turnira proglašen je Damir Bajić. Svim učesnicima su uručene diplome i zahvalnice, a najboljima medalje i pehari. ■



Otvoreno prvenstvo u karateu "Ilidža open 2019."

Karate klub "Champion" Ilidža, tradicionalno je organizator Otvorenog prvenstva u karateu "Ilidža open 2019". Prvenstvo u karate, 14 po redu održalo se 16. i 17. marta 2019. godine u Sportskoj dvorani KSC Ilidža-Sabit Hadžić.

Otvoreno prvenstvo Ilidže je internacionalni karate turnir koji se tradicionalno održava u sklopu manifestacije "Dani Općine Ilidža", a koja se odvija u više etapa kroz sportske, kulturne i druge tipove manifestaci-



ja. Generalni pokrovitelj manifestacije je Općina Ilidža. Na turniru je bilo više od 1.055 takmičara, iz 93 kluba i osam zemalja regiona. Najbolje rezultate na ovom turniru imao je KK Champion, drugi su bili Budućnost iz Podgorice, a treći KBS Tuzla-Sinbra. KK Champion iz Ilidže osvojio je na ovom takmičenju 51 medalju. ■

Prošlo je osam godina kako nije sa nama

Učenjem Fatihe i polaganjem cvijeća na mezar Amira Čenanovića, učenici Osme osnovne škole "Amer Čenanović", predvođeni direktorom Vahidom Čustovićem i članovi Gorske službe spašavanja i Streljačkog kluba "Ilidža" obilježili su osam godina od smrti nekadašnjeg načelnika. Ilidžanci će načelnika Čenanovića pamtiti kao čovjeka koji je imao plemenito srce, koji se trudio da Ilidžu učini boljim mjestom za življenje.

Obavljajući dužnost općinskog načelnika kroz nesebičnost i veliko zalaganje ispoljavao je vizionarstvo i upornost u provođenju vlastite strategije u borbi za prosperitet svakog stanovnika Ilidže. Umro je u 51. godini, a posthumno mu je dodijeljena Zlatna plaketa Općine Ilidža. ■





Tradicionalna ulična trka „Amer Ćenanović“

Prvog aprila 2019. godine navršilo se osam godina od prera-
šilo se osam godina od prera-
ne smrti načelnika Općine Ilidža
Amera Ćenanovića. Tim povodom u znak sjećanja na ovog velikog i plemenitog čovjeka, 29. marta već osmu godinu zaredom održana je ulična trka „Amer Ćenanović“.

U trci dužine oko tri kilometra, koju je organizovala Općina Ilidža, učestvovalo je 500 učenika osnovnih i srednjih škola.

Prvo mjesto među djevojčicama osnovnih škola osvojila je Hena Kapidžić iz Desete osnovne škole, drugo Almina Selimović iz Osnovne škole Hilmi efendije Šarić i treće Lejla Bibović iz Šeste osnovne škole. U kategoriji dječaka prvi kroz cilj prošao je Aldin Fazlagić iz Druge osnovne škole, drugi Edin Smajić iz Devete osnovne škole i treći Seid Pramenković iz Devete osnovne škole. Od srednjoškolski prva je bila Džejla Turković iz Srednje tehničke škole grafičkih tehnologija, dizajna i multimedije, druga Emina Zolota iz Četvrtog gimnazije Ilidža i treća Hana Bećir-



hodžić iz Tursko-Bosanskog koledža.

Prvo mjesto u kategoriji učenika srednjih škola osvojio je Refad Hadrović iz Tursko-bosanskog koledža, drugo Faruk Hasanović također iz Tursko-bosanskog koledža i treće Ermin Mahmutović iz Srednje tehničke škole grafičkih tehnologija, dizajna i multimedije. Medalje i zahvalnice pobjednicima su uručili predsjedavajući Općinskog vijeća Ilidža Muhamed Omerović i Edin Hošić dopredsjedavajući Općinskog vijeća Ilidža. ■

